

四庫全書

集部

欽定四庫全書

少室山房集卷三十九

明 胡應麟 撰

五言律詩七十一首

呂梁阻風呈徐使君

彭城遙騁望突兀見黃樓驟雨悲泥滑狂風畏石尤千  
山攢地出一水抱天流羨殺徐車騎干旄控上游

寄李景穎

一騎長干去千花簇珮環尋仙句曲洞作吏秣陵關鳳  
吹金門寂龍旛玉座閒寧知鬪棋夕夢入爛柯山

贈王生

不假茆為杖偏宜杏作林五龍扶蹻遠一虎住菴深古  
洞探瑤笈名山弄玉琴丹砂勾漏滿計日化黃金

夜集王太僕聽歌

列炬明粧出寒宵興未涯翠翹偏束鳳青髻儼塗鴉艷  
艷珠搖月亭亭玉照霞細聽桃葉曲身在騎曹家

寄王山人

役役浮生老誰同  
戰勝肥生涯南畝  
林世事北山薇  
短笛吟蒼靄  
長鏡斲翠微  
異時眠帝座  
星斗動龍旂

送黃生六治還灤州

翩翩江夏客  
才望世無羣  
旅興殘春雪  
歸心促夏雲  
吳歌新白紵  
楚黛舊紅裙  
惆悵平康陌  
芙蓉折劍文

佛日少傳趙公設  
供齋頭  
魚抱新誕兩郎君  
出拜紀以小詩

綺閣仙雲曙黃扉佛日晴隋珠雙照夜趙壁互連城學  
語翻多態迴眸欲寄情異時符抱送花萼照蓬瀛

胡靜父邀集齋頭賦

拚作扶筇過誰言病未能長吟飛綠醕劇語墜青燈射  
策空三殿傭書遍五陵十年湖海夢行脚愧孤僧

野寺古槐奇絕亭亭如車蓋四望皆同樹身屹  
立丈許其顛折為五枝折處寬平可四人箕  
踞坐余挈胡茅兩生散髮豪飲其中日暮乃

下

古樹空王宅重來一抱琴清陰浮廣殿黛色挂遙岑薄  
暮涼風動先秋皓魄臨南柯塵夢斷千劫護叢林  
落落蒼鱗皴亭亭翠幄懸百圍全蔽日千尺競參天老  
榦巢孤鶴踈枝咽亂蟬漫誇丞相宅瓔珞梵臺前

過吳生夜飲作方徐茅王諸少同集

落日襄陽道間來醉叵羅狂夫能劇飲稚子亦清歌卷  
幔當紅藥移燈就綠蘿平生雙白眼花底暫婆娑

偶挾荆高伴，過從赴晚涼。  
飛觴臨廣陌，秉燭坐虛堂。  
萬事消詩癖，孤踪劇酒狂。  
興來頻散髮，宇宙入高陽。

題黃隱君靜軒冊

青山鹿門宅，大隱自何年。  
密竹披三逕，長松幕四筵。  
鯢鵬秋偃息，魚鳥暮留連。  
曳杖南鄰客，時時問太玄。

夜集黃變卿言別時余將暫入都門

紫陌居相亞，玄亭路不遙。  
攜琴斜照落，擊筑斷虹飄。  
逸興舒河朔，離心怯灞橋。  
拚成千日醉，徒御發深宵。

寄李逸人

自得丘中樂閒居鬢欲皤青精鄰叟共白墮野人過緩  
步依松竹長吟向薜蘿漫愁歸路濕湖上有漁蓑

贈月仙為蔡茂才

問竹來朱戶如花出玳筵飛觴霞外客鳴珮月中仙艷  
色蟬光墮佳期兔魄圓相攜廣寒榭長夜奏鈞天

贈陳生即席

咄咄陳生在相逢尚黑頭風傳中散弄月照廣寒遊織



屢長捷戶擔簦不卧樓醉來雙眼白未懾武安侯

贈支山人

早挾長桑術青囊不記年懸壺居小市擊筑問高天逸  
興燕臺上狂歌漢闕前將因被裘客歸釣洞庭編

贈楊生叔嘉

宛爾清揚客翩翩玉不如看花晴曳屩擲果暮迴車意  
氣紅顏外聲華綠鬢餘即今逢逸少白練為誰書

座中有名蓮萼者持扇乞題即席賦

爛漫芙蓉色居然似六郎朝雲團翠蓋夜月舞紅裳景  
奪前溪麗香飛太液長空令李供奉極目紫騮傍

鄧遠遊以八章見贈推挹過當奉報二詩

有美青雲客才華蔚鄧林中原馳捷足上國締同心磊  
落千言賦飛揚七步吟寥寥燕市筑一擊為知音

屈指詞場彥翩翩意未降過江原第一華國定無雙稍  
結名流襪終寧上將撞生花寧夢寐五夜筆如杠

送胡將軍之遼左

片雨都門霽飛花照別筵舊持橫海節新隸伏波船鼓  
吹漁陽外旌旄鴨綠前歸來歌杖杜金印出甘泉

乍拂千金劍仍為萬里行長纓紆北望大纛賦東征鉅  
鹿雲連塞盧龍雪照營春風薊城畔獵獵動飛旌

胡鴻臚五十舉子詩以賀之

書來滄海上喜色耀門闌天闕珠呈樹堦庭玉照蘭紗  
廚迴霽色繡祿怯春寒冉冉凌雲翮無憂暮景闌

題陳山人畫松二首

半壁嵐光潤高堂露色濃寧同居士隱不受大夫封翠  
羽疑藏鶴蒼鱗欲化龍何年值韋偃洒墨傍孤峰

懸崖一千尺誰寫碧綢繆直幹遙撐雨疎枝亂拂雲天台

寒影落靈谷夜濤聞恍惚蕭郎管狂揮白練裙

蕭子雲書如  
孤松一枝

王至卿乘輿見假賦謝并期試事入長安

炷炷青油憶平分片諾中乘輿勞鄭相藍輦狎陶公未  
擬驅金犢寧須跨玉驄燕臺百里近六翮趁天風

寄李長史

一為珠履客十載滯邯鄲此夜叢臺月應同易水寒壯  
心猶躡僑華髮漸盈冠幾度黃梁熟盧生夢未闌

王生母六秩乞詩

燦爛支機色華筵瑞靄籠星橋寧駕鵲雪案祇丸熊玉  
洞三芝紫瑤池萬樹紅劇憐雙彩袖膝下舞黃童

送易山人

老作平津客囊金出塞多千花離紫陌一葦度黃河金  
泣歸時夢盆傷醉後歌東籬秋咫尺掃榻向藤蘿

題郭金吾冊

金吾行樂地瀟洒接蓬萊  
玉樹雙莖長瓊花四座開晴  
光搖院落春色遍樓臺  
一夢羲皇杳池鷗莫浪猜

王至卿借騎入長安賦謝

未邁中涓訪猶勤上駟來  
壯心懸伏櫪逸足借登臺  
蹴跋看龍種飛騰羨駿才  
天閑雲五色矯首見蓬萊

題韓節婦卷

蚤遂殞身願都忘別目愁  
結襦才六月懸帛已千秋  
大

節冰霜擅貞心鐵石留祇應連理樹一夕冢前抽

賀人得雌并慰之

春色畫簾中衾裯瑞靄籠蘭肌初浴雪蕙質乍含風夢  
豈熊羆異苞應鸞鸞同連翩燕姑夢孔釋下遙空

同王行父管建初汪公幹謝彥雲集區太史館  
即景分賦余得盆中紫茄

寧知草莽質邂逅入金門湛露晨披葉仙霖夜沃根桃  
緋殊度索瓜紫羨崑崙却笑於陵客攜鋤傍帝閭

何來天祿畔繞砌列嘉蔬玄圃刪雲種青門抱月鋤含  
苞花爛漫綴寶樹扶疎一飽堪晨夕那能賦衆狙

送郭尉之河南即席賦

潑灑芙蓉幕君權一尉行官衙漳水岸帝苑洛陽城寶  
劍衝星發銀箏抱月鳴黃花薊門市滿擱照離情

挽陳太夫人孝廉仁夫母也

一夜青鸞札流黃罷錦文去逢瑤水使歸伴玉華君楚  
珮俄捐月秦簫暗拂雲那堪北堂畔風木驟紛紛



挽胡太夫人為太學潑元賦

九熊聞淑媛跨鳳逐仙娥  
晚日凋蘭蕙寒風廢蓼莪  
珮環新玉闕機杼舊銀河  
躑躅春暉恨霓裳隔大羅

送趙參軍

矯矯平津客林間識仲容  
傳家留一鶴入幕佩雙龍  
樹色遼城近花香漢殿重  
尚期明月下憶汝汎芙蓉

寄黃說仲

屢入參軍幕頻依上將幢  
華名今第五雋譽舊無雙  
倚

馬才仍捷歌魚意未降  
經旬會偕汝千頃濯長江

壽趙隱君

茆廬仍負郭戶外綠陰重  
幾夜裁玄草頻年事赤松  
雙溪雲墜笠四洞雪沾筇  
却笑龍門史低眉傳素封

壽畢中翰太夫人

潏灩西池酒笙歌擁百壺  
三珠呈海國片玉耀天都  
札付青鸞否簫迎彩鳳無  
丹砂滿庭砌昨夜到麻姑

送沈廣文之侯官

日暮河梁畔歸帆趁北風一羶初就日雙劍舊如虹驛  
路薰葭外齋頭苜蓿中飄飄幔亭宴霞色近人紅

送章博士之崑山

共作燕臺客君歸思欲狂雙鴻馳海岼獨馬倦河梁故  
國蘭苔近新齋苜蓿長崑岡偕片玉獻歲到明堂

送張生還四明

一樽殘歲別揮手各淒然野凍層冰外山明積雪前貂  
裘秦苑敝鳥迹漢京傳到日尋安道應維入剡船

感事二首

五畝荒猶客彷徨素髮侵年華趨老大詩思入沈深絕  
域舟車夢危途劍戟心飄飄灞陵雪無賴入衣襟  
濫逐齊門好真逢蜀道難百憂攢鬢底孤憤疊眉端布  
被翻霜薄綈袍綻雪寒蒼筤富春渚老盡釣魚竿

題楊母冊為其子舍人

綸綽飛青瑣恩光下紫宸龍章雙闕耀象服九原新寶  
籙傳金母珠襦映玉人惟應寸草念百結遠三春

期曹能始登岱二首

一尊高館暮下榻意偏勤旅興窮燕雪歸裝促岱雲簫  
傳雙鳳吹劍合二龍文何限賡酬事無令洛下聞

夙訂金蘭社聊辭玉筍班片帆同挂海雙屐互登山梅  
柳爭春發松蘿結夏攀天門和梁甫聲振白雲間

送曹能始遊盤山

勝欲窮三輔幽仍問五盤輕裝凌曙色短褐耐春寒壑  
宵雲全卧峯明雪半殘帝京樓殿近百里見朱欄

過楊不棄索其丹青適大雪盈尺即席題

怪底春城雪從君筆下飄  
飛花藏遠寺古樹折平橋  
背吟方劇龍團興未銷  
倪迂倘留客清悶日相邀

再賦

飄然逐朋好來過百花潭  
雪照藍田畫風生碣石談  
落梅俄塞北飛絮詎江南  
極目招提上同雲遍鬱藍

題夢竹卷為吳孝父山人

亭午華胥國翛然萬玉長  
吹簫疑嶰谷捩柁即瀟湘  
霧

色偏籠座風聲半入廊何當挈劉阮斗酒日相將

江村卷為吳太學題

新安江色近一曲抱村幽日暖蘼蕪岸風恬杜若洲  
亭臺通鶴逕籬落繫漁舟四百灘頭路將因到子猷

題張文仲母孀節卷

截髮甘扃戶同心悵結褵百年蒿里夢五夜柏舟詩  
熊膽含辛日鴛衾入夢時斑衣張仲在好為賦瑤池

過皦生齋中即席題

蕭然一凭几兀坐萬緣空舊茗猶含綠新梅半著紅山  
疑摹北苑石擬贈南宮好覓金波句清尊後夜同

別章敏學

青絲綰朱轡追送潞河潏寂寞窮途淚支離故國心晨  
炊投古戍晚宿寄荒林何限浮雲色雙龍入夢深

同徐文明六客集竹里館時余太學為主人

屈指春光半尋芳興未窮竹溪偕六逸花墅挾雙童劇  
飲妨歸騎清歌落斷鴻遙看燕市月冉冉入簾櫳



入長安路逢徐文明蒼頭持新作見貽和答

輕寒策羸馬蹶躡向風塵筑問燕山社帆留潞水津浮  
沈金腰裏飛動石麒麟縱目春明外花朝萬樹新

過徐文明郎適陳長芳在坐作

款段春風裏頻遊興獨狂抽毫尋孝穆卧榻對元方雲  
似飛天姥霞疑挂石梁芙蓉雙燦爛乍夜夢干將

載過曹能始時能始入長安余暮留齋頭翌日

題詩壁上

夜掃陳蕃室春雲繡褥溫敢言龍卧榻無復鳳題門西  
笑非吾事南遷亦主恩長門會題賦漢武欲消魂

胡靜父攜盒過大槐寺作

拂曙青絲轡提攜潞水東為尋芳草色重到大槐宮老  
榦排丹壑疎枝礙碧空黃梁炊漸熟千劫夢魂中

野寺別于鳳鳴李惟朴兩生

尋幽來古寺霽色傍禪棲劍豈雙龍隔門難一鳳題夕  
陽高枕外新月亂帆西共惜天涯別何妨醉似泥

贈汪生

暫卸東山屐言乘汎海航遺書觀魯甸古樂問齊方白  
纒鼓高座紅粧醉曲房踏歌潭水畔人識姓為汪

壽吳隱君希學七秩

君平曾寄蜀尹喜尚留秦杏植三千畝桃偷七十春壺  
中長宇宙屐底半星辰白日飛雞犬無勞頌大椿

再遊大慈岩三首

前卷遺去  
遂補入

仄徑攀蘿薛明霞挂石梁危崖常墮虎怪石盡成羊綠

篠千林合青松半壑藏雲房遺象古恍惚見齊梁  
不倦探奇足名山到處尋筍輿迴谷口蘿殿出雲心絕  
壁千松挂高空萬籟沈不知傳大士何代布黃金  
逕草重重綠岩花處處紅猿聲山寺合鳥道石房通峭  
峽行無際平疇望不窮世緣吾欲斷聳翮上天風

少室山房集卷三十九

欽定四庫全書

少室山房集卷四十

明 胡應麟 撰

五言律詩七十六首

侍御葉公初度賦東四章

時中秋  
後五日

白鹿梯仙境青牛柱史臺東華晴旭現南極瑞雲來玉  
藥凌蒼柏金莖映綠苔黃封將湛露澈灑出蓬萊

另繡輝瑤席鸞笙奏玉除紅雲三島近白露九秋餘祝

頌填宮觀謳歌沸里閭西冷木蘭棹花色擁芙蓉

曙色重關外湖山列壽觴桂圓猶八月菊吐漸重陽紫  
鳳新辰極青鳧舊上方天風何處落一曲度霓裳

繡斧清朝出先生大海涯梅鹽徵相國柏酒送仙家烏

履排青漢衣裳逗紫霞錢塘十萬戶簫鼓沸蒹葭

公時  
按釀

送吳山人吳時為桃花會

豐樂橋邊路相逢鬢未皤形骸長土木夢寐半雲蘿洞  
口銘題鶴池頭帖換鵝桃花飛欲盡曉發奈愁何

題胡京孺三緘齋

玉塵揮仍置金人戒不忘譚寧空稷下辯已詘華陽塞  
兌遵玄聖冥心對上皇白圭晨起誦三復意何長

林孝廉以黃堯衢書至并新詩投贈報以此章  
席帽戴殘陽翩翩白面郎登龍年尚少繫馬日偏長萬  
卷窺藜閣雙鉤合草堂寄聲黃叔度夜雪待孤航

永叔坐中戲贈奕者鄭童

十五侍王郎盈盈坐隱囊雄思馳虎穴險欲控羊腸玉



洞青霞麗金庭白日長  
母懷陸郎橘高跨赤龍翔

壽陳翁

大隱聊城市青霞渥妙顏  
一壺懸海岱雙屐占湖山  
繞砌蘭芽茁當樓桂魄閒  
中宵占紫氣已到穆陵關

午日訪吳文仲使君適湖上燕集寄柬二律

午日尋芳候千秋祝聖年  
樓船浮別島簫鼓列長筵  
紫翠仙城出丹青梵剎懸  
金闔折垂柳何似越門前

騎吹千山外招尋總勝遊  
蒲觴飛別墅桂楫競中流  
日

湧江心鏡霞增海上籌天顏欣欣尺一望翠雲裘

吳公以萬

壽入都唐人祝賀用鏡水  
心鏡以午日鑄唐小說中

次日集明府齋頭長君文學侍坐

依然五楊柳丈室卧東臯海岱驕鴻翼林塘狎蟹螯飛  
觴春色淺秉燭夜談高冉冉凌雲氣池頭著鳳毛

狄叅戎邀集園亭觀女劇即席賦

將軍西第燕奏伎鬱金堂樊素先登席秦青正繞梁巫  
雲飛繡褥楚雪照羅裳不盡淳于興留髡夜正長

飄飄青鳥使晨迓白鷗羣艷舞偏傾國嬌歌盡遏雲江  
深桃葉度灘遠竹枝聞不分黃花色霜前撲畫裙

羅生館中閔伎作

是夕奏梁辰  
魚吳越春秋

逆旅愁無賴良宵興若何纖腰呈楚舞稚齒發吳歌院  
落飄紅霧樓臺駐絳河扁舟拉西子蚤晚若耶過

為採傾城色聊停上漢槎興移金谷樹春滿玉臺花益  
壽懷差壯安仁鬢未華異時雲水約珍重越溪紗

同方上舍集施山人二首

時立春  
前一日

旅況新年接鄉心故國同吟猶懷洛下語漸識齊東選  
草初迴綠園桃欲放紅朝攜雙蠟屐南陌鬪春風  
柏葉孤城蚤梅花絕域遲暫將春雪興同醉暮雲時白  
練毫飛洒青燈劍陸離吳歌夜闌發星斗墮敲棋

王將軍邀集西園賦時大雪初霽

將軍西第近曳履暮追遊不夜開瑤圃先春宴玉樓月  
窺庭樹上雲逐劍花流片石燕然頂嵯峨待紫騮

張博士過訪賦贈二首

世業明經舊家聲作賦隆四知傳漢代三絕擅唐宮  
匣劍芙蓉麗盤飧首宿窮何人問奇字旬月坐春風

蕭然廣文郎半榻擁青氍著述河汾後樞趨泰岱前  
虛堂時繫馬高座幾懸鱣咫尺侯芭在花時過酒船

送周新之

久事元戎幕新辭上客行雪深離瀚海潮落到錢塘  
射虎矜衣窄歌魚笑缺長小喬粧閣畔計日望周郎

送汪生歸大鄣

客邸悵離羣連天木葉聞囊琴淒鶴調匣劍隱龍紋野  
凍黃河雪山昏白岳雲嚴陵吾舊宅一訊孔珪文

潞河遇陳子卿同飲胡澌元齋頭即席賦梅花下  
白社元同調清風忽故人荆高逢易水干莫照延津謁  
帝心期壯封侯骨相貧梅花齋閣底沈醉異鄉春

陳生出所藏半照及七首乞詩為離合作五言  
律

惜別佳人意酬知烈士腸粧臺分鳳影寶匣現龍光蓮

鏐誰同鑄菱花意對藏樂昌何日返見汝合干將

送趙別駕

參軍曾入幕別駕復移舟淥水蓮花隔清溪杜若留鸞  
聲吳甸曉騎火粵山秋好作師雄夢羅浮問舊遊

春日胡茅兩生訪王至卿攜妓東郊藉草暢飲  
迨暮泛舟從北郭歸

拂曙薊門東尋芳入亂紅園梨嬌墮雪堤柳淨含風逸  
氣雙鈎並清歌一棹同盈盈美人意悵別夕陽中

贈唐山人二律

暫輟嚴陵釣，懸壺向紫宸。  
仙莖攜沆瀣，帝座問星辰。  
白苧新燕客，青囊舊越人。  
昆明泉萬斛，花裏試垂綸。  
綵筆神飛動，青囊術有無。  
看松留泰岱，採藥望天都。  
霧引車前鹿，雲迎舄下鳬。  
異時滄海色，千古屬潛夫。

和吳茂先悼亡

王生馳夢日，潘令悼亡年。  
雨滅巫峰外，雲沈洛水前。  
笑言孤枕共，形影一燈懸。  
好借文成術，紗廚望晝眠。



于鳳鳴攜酒慧覺禪寺作

尋幽偕賦客古剎亂雲傍優鉢千花淨菩提一樹芳談  
天遊淨樂掃地坐清涼欲共寒山衲西歸不二鄉

贈真頭陀

南州來賦客北苑問高僧佛土窮三界人天度七陵孤  
雲晨拓鉢大雪夜傳燈便欲逃禪去風旛證惠能

再賦同吳生

問法來方丈清齋供野蒲高禪逢普化古佛現毘盧大

悟三乘徹真空一念無那能將寶筏咫尺濟歸途

座中贈吳隱君

梵剎金銀布人天下夕陽菩提千界淨荷芰六時芳渺  
漫恒河筏蹉跎劫海航憑君畏壘下一授衛生方

贈鄭生

卜居仍海嶠門巷一壺懸采藥陶弘景迷花孟浩然星  
垂漳水釣月引衛河船縱目金華頂羣羊正熟眠

吳生談魯連臺在遼城東北未有題咏余素高

其節俠即席賦此

巖嶂高臺畔猶傳俠客名千秋餘故壘片札下堅城晚  
日殘花墜寒雲蔓草平誰言蹈東海風馭入蓬瀛

吳希學齋頭鸚鵡學語慧甚戲贈此章

似汝聰明質誰將閉玉籠鄉心馳隴右野語狎齊東倚  
竹身全翠餐桃頰倍紅秦宮三十六一一訴春風

贈耿中官

萍梗淮圻北桑弧碣石東心長懸魏闕疏屢入隋宮色

相三途幻因緣四大空侯鯖頻日饜拂袂近春風

送倪明府

熒熒蘭陰里銅符羨晝遊鳴琴聊寄傲岬嶺正風流桂  
折羅浮頂梅探庾嶺頭黃金臺百尺獨步佇驂騑

贈盛明元昆仲時余將卜居葛湖之傍以諸子  
翩翩雅尚有足依者焉

盛世埴簾合翩翩逸興同六龍齊潁上三鳳倍河東玉  
樹聯花萼瓊枝壓桂叢滄浪分一曲肯著杜陵翁

諸盛  
凡六

人

高門懷伯仲上座集賢豪對列三珠樹同揮五色毫披  
襟憐爾輩結襪愧吾曹老大才名盡惟應把濁醪

題湖上方舟四首

有序

舟下聯三小蜻蜓艇上覆方板衡徑丈許縱  
倍之欄檻四列頂幕青油中二髹几可坐十  
人寬平軒爽規製甚適盛明元氏昆仲所創  
以待賓友之汎湖者余既日以杯酒從事遂

賞以五言四章

桂楫漾沙棠朱欄十尺強三舟聯錦纜四柱簇牙檣障  
日青油麗凌風翠黛狂洞簫明月底一曲和滄浪

平湖秋色淨一舸繫葦葭懶構思光宅堪浮少伯家窺  
簾鳴鸛鶴掠檻度魚蝦竟夕看明月無勞促曙鴉

薄暮方舟集芙蓉次第尋臺驚浮水面亭似壓波心雅  
稱苔川釣偏宜笠澤吟浮休定何日一壑暢幽襟

湖上暮雲稠青絲蕩碧油移舟過巨石浮筏向中流擬

作張騫泛真同郭泰遊余將挈佳麗日醉大隄頭

盛母孀節詩為思達思弘題

盛世高孀節光增嫠女奇志堅初矢日年倍未亡時片  
玉懷中抱雙珠膝下遺桃花三月近戲彩傍瑤池

贈雲濤祝生所狎美人也

翠袖揜笙篴居鄰八咏樓雲偷巫峽曙濤占曲江秋經  
卷王姬誦詩箋薛媛留何妨祝融氏同赴爛柯遊

思齊夜出楊瓜佐酒稍異常者訊之知楊姥得

諸異人即席賦此

何代貽嘉實纍纍越水涯稱名同邵圃問姓是楊家五  
色縈丹洞三漿爛紫霞異時營子母蘿蔓日交加

贈李廣文

舊國天都近新齋婺女懸彩飛江令筆青挾鄭公壇三  
洞雲攜屐雙溪雪放船無誇沈侯句苜蓿誦嘉篇

送柳使君之南雄

五馬趨西風朱幡氣槩中淮陽移長孺蜀郡待文翁梅



發新郵使棠飛舊寓公羅浮峰四百躡屐遍秋空

送王廷尉還東陽

時有鼓盆之變

畫遊蘭渚上花色艷簪裾舊翥雙鳬舄新馳駟馬車紅  
雲燕日近綠水發星虛藉藉張廷尉高門葺故居

送沈明府之江右

五馬畫飛揚雙龍照夜光公庭高岳底官解大湖傍  
舊讌虛平樂新恩出建章為知良吏傳藉藉贊龔黃

暮秋病肺夢中作

微霜九月朔一病罷登臺熟睡蟬聲裡柴門午不開  
茶烟紫翠篠藥裹翳青苔兀兀巢居子塵心且未猜  
竟日焚香坐丹楓敞畫屏參同原有契道德豈無經  
白露高塗屋青山遠抱亭那能世緣縛華髮已星星

題趙鴻臚文鎮西園並蒂黃花

並蒂秋難老同心暮更嘉金莖雙濯露玉蘂對凌霞  
色映天隨圃香飛靖節家翩翩白衣過把酒興無涯

花朝吳孝父邀集高深甫湖上園亭

名園總宜客春半大堤頭淥水時  
扃戶青山日滿樓攜壺新雨過  
挾瑟亂雲流漫惜花朝宴拚成  
列炬遊

送吳文仲使君并懷參知睿父二首

鼓吹錢塘驛帆檣趁暮潮雙龍  
初析羽駟馬暫停鑣繡鉞吳門  
近牙旌越嶺遙異時成握手列  
炬坐深宵

後乘遵吳苑前驅問薊方瞻依  
猶大樹蔽芾盡甘棠霧躡三天  
紫雲停六洞蒼提攜更何日爛  
醉舊高陽

寄吳希學徵士兼懷啓元茂才

萬事總長缺一身餘短筇別三天子障吟五大夫松滄  
海有時涸丹砂何歲逢周顒卜居近憶卧定林鐘

過俞羨長小飲二首

有序

羨長寄居吳山之麓四壁蕭然僅圖書盈篋  
笥余為欸語移日歸寫其風素成詩二章

極目函關曉居然異氣停姓名高逸傳身世太玄經獨  
鶴雲蹤杳雙龍電色靈孤山梅萬樹新著少微星

四壁圖書滿藤蘿壓座蒼陸渾新邸僻陽羨舊田荒大

業占毛穎雄心托杜康褐衣吾自貴未擬謁金張

送汪山人歸四明四首

兩鬢懷人短雙瞳作客方文淵神矍鑠叔夜思昂藏薜  
荔裁衣古蘭荃結珮芳戴顓精舍近歸卧白雲長  
相逢寧海岱對語即江湖肯抱臨淄瑟聊攜督亢圖官  
衙吟苜蓿客館寄菰蘆異日山陰興能來白玉壺  
玄亭吾久閉問字不辭勞妙訣青囊古雄談白氍毹東  
瀛朝濯髮北海夜持螯極目河梁雨寒光隔珮刀

邂逅青山陌飄然思不羣乍歸鄞海月長嘯激溪雲劍  
擁蒼精氣符懸赤伏文東山逢謝傳好作片鴻聞

輓祝母

飄飄易遷駕凝望白雲長橋迥分鳥雀臺高失鳳凰東  
陵辭聖母南海謁空王何夕雙溪水重懸嫠女芒

唁祝遜之

傳聞倚廬客布帽碧山阿讀禮依松柏傳詩廢蓼莪熊  
丸魂夢遠雞骨淚痕多迢遞支機石無由問絳河

謁董江都祠二首

太息江都相遺風尚宛然  
惟疑曾下日園憶未窺年大  
業尼山後真源洛水前天人  
三策在不廢萬年傳

一逕浮雲入千崖落照明廣川  
新廟貌繁露舊家聲水  
綠平吞市山青半壓城九原人  
可作相對話西京

寄潘上林二首

南海潘上林少丞光祿伯子也嘗共集黎秘書  
邸雄飲達旦別去廿載矣今春余卧疾武林忽

遠寄手書新刻盈篋爛然慰藉之餘聊寄茲什  
廿載長安陌君能憶酒狂片鴻來庾嶺雙鯉到錢塘賦  
草新藜閣詩篇舊柏梁春明退朝晚擲果遍奚囊

憶弱冠燕中惟敬少丞朝暮遊往或浹旬不  
面則咸詫為疎迺今諸儕輩略亡存者即君  
華吏部喪逝繼之河山之感觸目飛動今覩  
上林君羽翩翩典刑如在重賦此章

落魄南皮社壺觴數往來夜眠光祿邸晨叩秘書臺永



絕抽毫彥猶餘執戟才重看潘騎省題賦入蓬萊

壽王山人子英

初度逢元日華筵正七旬遺經藏甲乙秘錄授庚申庭  
樹三株發堦蔭一葉陳共欣蘭水上比屋頌靈椿  
宅寄吳山外籌添越海傍玉壺懸大藥金匱謁長桑紫  
府青牛駐玄關白鶴翔東風門第在拂面杏花芳

送黃野人二首

倦作蘭陰客花期一棹閒真形模五岳秘錄授三山電

掣蒼龍下雲驅白鶴還越王臺漸近先到若耶灣  
自得茅山秘休糧卧翠屏銖衣朝絳闕玉簡誦黃庭六  
甲時觀象庚申夕煉形石床雲霧滿懸珮濕青萍

題黃上仲大有山房卷

吾憐黃叔度一榻抱雲眠早賦中原雪長吟大有天  
瑶芝榮積石玉乳噴飛泉笑我金華洞羊羣正熟眠

少室山房集卷四十

欽定四庫全書

少室山房集卷四十一

明 胡應麟 撰

五言律詩八十九首

破山寺偶題

高禪何處尋杖屨入祇林古寺無人到虛堂落葉深溪  
光經雨滅瀑響過雲沈兀兀繩床客誰明定慧心

送王文學還武昌時以陳從訓書至

問姓曾驚座藏名類接輿到偕京口雁歸赴武昌魚竹  
素千秋上芸編萬帙餘相逢不成醉天末意何如

澈溪別業二首

茅廬南郭外十畝帶橫塘曳杖青山遠飛槎淥水長花  
香浮雪壁竹影動雲房五岳游堪卧悠然號上皇  
卷帙桓譚富篇章杜甫貧乾坤容傲骨海岳遂閒身坐  
挾垂綸客行招荷鋤人一癡殊未厭久已絕貪嗔

壽范茂才

當年聞五范閭閻首吳中  
咫尺金閭下仍看玉樹蘂青  
鸞翔海日白鶴舞天風  
謾逐東方去冰桃萬核紅

葉太孺人輓章六首

懿行標彤管芳聲動紫宸  
庭前驄馬客膝下豸袍人  
南岳金璫返西華玉珮陳  
惟應萬家淚雨注婺州民

鸞章晨北極鳳管暮西池  
萬室悲慈訓三朝頌母儀  
修齡逾大耋上壽接耆頤  
咫尺潘輿在傷心白日馳

劬勞初罷誦聖善舊徵歌  
母德傳中壘仙踪赴大羅  
音

容吳里隔涕淚越天多寂寂支機杳無由覓絳河

慘淡九熊夕輝煌冠翟年寧知蒿里淚偏洒柏臺前素  
嬖含霜動丹旗抱月懸異時良史筆閭德照重泉

令譽中閨擅恩綸上國來青鸞朝玉闕紫鳳集瑤臺落  
日萱花逝飛霜蕙草摧朝看攜萼綠聯袂上蓬萊

何來三鳥使相逐絳臺傍夜月殘西島晨霜浸北堂叢  
蘭芳獨遠寸草恨空長尚憶飛雲起停車望太行

湖頭夕汎

十里平湖色芳菲  
夾大堤山迴雲夢澤  
水出武陵溪渚淨  
鳬鷺浴籬明  
鳥鵲棲沙塘  
何處泊  
隅港已聞雞

送李太史使湘中

片帆春草外  
千里問衡陽  
劍履金閨色  
衣冠玉座香  
攀雲遊岳麓  
冒雨宿高唐  
蚤就湘娥賦  
鳴珂入建章

宿嚴灘作

扁舟富春渚  
迴望潏溪濱  
淶水晨生霧  
青山暮出雲  
荒村猿嘯侶  
廢崦鹿成羣  
會著羊裘在  
母令漢殿聞



望湖亭雨中作懷祝鳴皋

極目危欄外秋光亂夕春雨聲千澗集雲氣兩湖重翠  
壓仙壇竹青舒佛院松美人烟水畔何處采芙蓉

一夢

一夢遙天未羈人萬里心關河秋氣早風雪夜來深擁  
褐聞征雁褰裳見宿禽誰哉共尊酒燒燭自長吟

送劉內翰使嶺西

拂曙下征軺鳴鞭出灞橋方輿窮百粵土俗辯三苗樹

色枕椰古花香豈寇饒金門持戟暇魂夢憶瓊瑤

彭城雲龍山晚眺憩項王故臺并酹亞父冢有

懷題

返照長河急浮雲大澤空遙凭孤閣上俯眺萬家中地  
廢悲王略天亡惜霸功荒墳猶亞父涕淚盡城東

送李鴻臚之白下

白面紫薇郎承恩出建章啼鵲催別騎舞燕逐征航日  
抱金珂影星搖玉劍光秣陵佳勝地蚤晚賦長楊

送閔孝廉之茗中二首

落日抱離旌蕭蕭白雁鳴夕陽孤劍別秋水一帆征粉  
署寧親思彤扉謁帝情河東新草就珥筆上瑤京  
野色飄行旆江光照客船長林楓葉路孤館菊花天狗  
監文初達龍門賦已傳浮家何日事問汝雪溪烟

九龍別業

何年遺別塢十畝亂雲邊五柳長垂碧雙松對草玄斷  
崖撐閣迥飛瀑挂亭偏滿目忘機客花時數放船

問李惟寅病

已似休文瘦還耽  
叔夜吟夢迴芳草遠  
病起落花深雨  
濤黃金甲風疎白玉琴  
蚤知朝謁懶藥餌稱閒心

壽吳淑人

春色重簾外笙歌晝未闌  
屏開迴白鶴席上舞青鸞  
泥露金芝秀凌雲玉樹寒  
冰桃漫留核方朔已偷殘

吳山人持齋戲贈

笑汝清狂客持齋繡佛前  
周顒元護法何屑舊逃禪  
嶺

砌須彌石池疏阿耨泉脩然攜手去塵外息諸緣

白雲世德詩為林孝廉賦

誰專巴穴富夙擅渭川封薛氏誇三鶩荀門羨八龍新  
居蟠翠柏舊壠夾蒼松何限孫枝在林林玉樹茸

題林孝廉家慶圖

棠棣偕芳日椿萱並茂時金莖懸五葉玉樹綻雙枝海  
鶴傳書近山鶯度曲遲今來上元宴麟脯擘含卮

送陳季相還七閩

乍得溪頭信俄欣海上逢雲山偕獨往湖海狎高踪坐  
嘯雙黃鵠歸騎兩赤龍相攜子騫侶十日幔亭峰

寄真如上人

行乞過三市隨緣住五陵南徐先舍筏北地遠傳燈古  
洞雲埋柏清池月挂藤門前多寶塔出定幾同登

輓鄧太翁兼唁遠遊明府四首

此夕仙槎逝當年宦轍迴松猶彭澤澤撫木已豫章頽獻  
賦名空藉修文業未摧祇應豐獄底劍色謝風雷

東華新劍珮南楚舊弓裘世系蕃高密鄉評重太丘經  
猶傳馬隊勅已下螭頭藉藉承家譽相望在斗牛

政爾生芻隔將無宿草茸孤亭徐孺子大厦郭林宗素  
旒霜華薄丹旌露色濃異時銘太史不受漢亭封

化鶴還丹嶂騎鯨上碧虛一竿遺蠡澤雙屐挂匡廬日  
朗新題碣雲寒舊著書鹽車何足恨千里屬駒駟

歙中謁徽國文公祠作

閩粵真人起高標自不羣丁年窮百氏乙夜攬三墳力

障驚湖水神遊鹿洞雲至今靈爽在長對武夷君

清源寺中戲效晚唐人五言近體二十首

有序

唐律元和後卑卑甚矣韓柳元白振代之才  
弗能挽頽波而力邇之古而賈簿姚監輩實  
始以清新奇僻闡別派于五言咸通以降歷  
世相沿上自宋初下迨元末凡詩家者流律  
有唐韻者率是物也舍是則又自為宋元本  
調迺初盛中三唐自沈宋孟王韋柳外大都



高閣束之明弘正諸先輩出有事掃除即李  
唐中葉剔去齒牙晚季奚有迺余絕長絜短  
篤而論之氣骨雄高聲調鴻碩當特屬之初  
盛諸家至抒情難言鑄景難狀形神湧出誦  
者躍如則晚唐獨造偏長亦間有足采者其  
格姑舍旃弗論可也余弱冠談執中原匠心  
曩哲至于斯義久畜胸中嚴羽卿氏所謂作  
法于涼懼繇隗始已亥北上卧痾清源禪寺

放棄羣典偶目僧房中支枕數軸首尾漉滅皆  
晚唐諸人詩因戲步其遺韻為五言律三十餘  
章匪曰亡羊于多歧抑亦求馬于全體云爾

寺憶支公住林餘惠遠蹤浮杯來大壑振錫上孤峰逕  
僻雲埋樹窻明雪照松跣躡貪佛日歸趨暮天鐘

大地懸香刹中天築化城重簷飛岳色古壁撼河聲法  
座琪花暗經壇貝葉明異時齋繡佛帝釋下瑤京

香積何年啟天風躡屩攀白雲平講座青靄覆禪關斷

碣橫高隴疎鍾出亂山一僧頭白坐兀兀定林間

雲霞尋老衲塵土拂征衫鹿叩談經石猿啼說法臺  
寒雲封密篠凍雪墮危杉何限宗雷句穹碑百尺錢

杖策平堤外輕風拂面柔寒山成獨往老衲話重遊怖  
鴿蘿龕下飛螢竹逕流將因謝塵鞅丈室住牛頭

能仁元海嶠伏毒舊江濱隘地龍藏雨高天鶴跨雲嵐  
深秋徑失瀑遠夜堂聞寂寂孟蘭想先題發願文

戶牖生虛白樓臺上鬱藍談經獅子吼護法象王叅檜

老斜撐石松枯半壓潭  
何因挈天女絕頂卧茆菴  
杖履初辭越菴堂半住吳  
臘深松樹老禪久桂叢疎  
五岳雲高下三峨雪有無  
異時騰劫海片笠授潛夫

蚤淨三生業真傳二祖衣  
蓮花叢佛座柏葉護禪扉  
石為懸燈動泉因卓錫飛  
居然離捧喝默會洞仙機  
為叩西方刹因停北上槎  
金身懸寶樹玉髻湧瑤花  
夢已清圓覺心將悟法華  
恒河歸去路雲霧繞三車

震旦聊乞食佛座湧金鼇  
骨瘦知吟苦眉長見臘高  
香

燈岩洞月杖錫海門濤近失瀟湘譜瑤琴廢不操

辭家來北岳結社向南屏夙擅降龍訣新傳相鶴經推  
敲臨野燒飲啄閉山亭夜夜康王谷飛泉獨坐聽

香爐峰外路雲日晝淒淒飛瀑當樓滿寒山入座低潭  
心龍女出塔杪雁王棲會逐曇摩履翩翩大磧西

一褐閉禪關孤雲盡日閑來從身毒國買斷沃洲山白  
象鳴鑾去青獅護駕還中天彌勒閣未許善財攀

十里華嚴界重來雪未消鍾聲寒殿出塔影夜池搖桂

樹縈堦發藤花拂座飄西來亂峰外有路入中條

淨樂傳尊者真如卧法王池幽菱芡熟殿古芰荷香一鉢擎秋雨三衣挂夕陽塔中多寶佛夜吐白毫光

萬峰天竺杪丈室寄禪心野鶴經秋卧山猿徹夜吟稻香雲碓遠花影石壇深一衲函高座相傳自少林

為樓依北固舍宅望西江竹遠通金磬杉高並石幢龍歸雲壓棟蜃起月沈窓孰是髯居士前身合姓龐

雙林曾授記百丈近安禪洞古頻棲鶻峰高欲墜鳶秋

燈雲閣外晚磬雪房前  
昨夜維摩到天花遍佛筵  
偶入清涼界同探大小乘  
北宗仍事秀南法已傳能旨  
遠連深竹花疎墜古藤  
故山瓢笠夢極目海雲層

廢寺十首

序意見前

寺敞千峰入橋危一逕通  
白牛遺漢像蒼鼠竄唐宮  
劫火頽垣外陰燐壞竈中  
南朝四百八成住盡虛空  
階基元晉代棟宇自梁年  
草閣螢潛住繩牀鹿借眠  
荒碑沈亂石廢沼咽寒泉  
擬喚廬山衲開山種白蓮

雙林遺古佛六代幾殘僧畫壁全封蘚香厨半壓藤池  
荒螢亂入塔壞蟻頻登一杖圭峰老猶談大小乘  
浮蹤仍岳麓舊宅寄岷峨摩詰終年病文殊信宿過池  
幽霜墜栗洞古雪封蘿一塔危崖上人傳舍利多  
落落蒲團好遙遙竹杖來寺寒千嶂入門淨兩湖開古  
砌風鳴葉陰廊露滴苔若為論去住千劫總浮埃  
松風隨曳杖伏翼走危欄古寺何年廢空門盡日寒流  
泉交井竈墜雪擁林巒欲叩西來意寥寥竺法蘭



脩然天姥外斷絕世人知老檜穿崖長寒松抱石敲鉢  
殘呼鼠共牀朽倩龜支一衲都忘老雲房自在披

疊嶺飛丹鷲殘碑記赤烏山風寒梵遠水月夜禪孤瀑  
洒林長潤岩傾樹半枯閒階蔓蒼蘚恍惚舊金鋪

禪堂餘結構破衲挂林樊宿霧沈荒井秋河沒斷垣杉  
深時墜鵲果熟乍聞猿寂寂拈花手應悲末法繁

寂寞空王座蕭森佛子廬蛛絲縈石屋虎迹印山廚火  
滅天然後燈殘慧可餘悠然念塵世昏黑重踟躕

壽程隱君

瑞日華筵啓明霞彩袖陳玄關懸大藥漆園現靈椿嶂  
挹三天子峰攜五丈人

白岳有五老峰君家其麓

朝來海籌屋紫氣

正嶙峋

寄包稚升二首

政績飛三殿風流擅六朝歌喉桃葉細舞態柘枝嬌廳  
事淮山月鄉書越海潮玉皇香案近八翼夢雲霄

何由滄水使縮地對仙曹綵悞江淹筆綈慙范叔袍高

牙瀕海戍巨艦夾河濤不分清江月盈盈入夢勞

題鄔生逍遙游卷

久客金臺雨渾忘鐵甕潮人從嗤汗漫帝許號逍遙五  
岳環孤枕三天挂一瓢秋風大鵬背穩坐上扶搖

送王令自錢塘博士遷富春

祖帳西泠畔驪歌薄暮聞一羶猶挂雪雙鳥已乘雲官  
舍新栽秫鬢池舊薦芹知君政成後絃頌繞江濱

是夕周元父攜琴命所懽賓姬為猗蘭之曲索

余贈詩再賦得街字

中秋先此夕露色滿天街  
桂折黃金蕊蘭垂碧玉釵  
高山懸廣座飛瀑繞空階  
會挈平原侶經旬臥竹齋

寄贈廉訪梅公

時方校  
賓興士

風裁百僚長繡斧曳朱衣  
姓氏書長樂光芒徹太微  
樓臺三竺繞鹵簿六橋飛  
煜煜黃金下花驄近帝畿

矯矯羣龍集掄才作賦場  
樓船移采石斧鉞駐錢塘  
官業三臺重鄉書一水長  
蚤知門下彥騰踏半飛黃

友人分惠秋海棠一本爛漫檻中自綴小詞命  
雙鬟霓裳歌以送酒醉中賦贈並命玉素和  
之

小徑移紅藥閑亭閉綠蘿神飛天姥夢興逐雪兒歌冶  
色矜眉黛流光惜鬢皤不須賡子夜風露帝城多

秋夜過沈純父同王文學汪山人聯句

已占青山色仍逢白社人沈仙槎分雨露祖帳出風塵

王夢繞三江樹心飛八月尊

汪

碧宵誇鸞鷟黃閣笑麒麟

麟好去嚴陵畔星河拂釣緡

贈陳鍊師二首

廿載雲臺觀憑虛謁上皇  
彌明孤髻短弘景一瞳方  
劃地蛟涎淨摩天鶴羽翔  
秋來九華枕遊厯遍扶桑

羨汝玄都客神情半沈寥  
黃梁炊處熟紫氣望來飄  
玉檢移新秩金幢問早朝  
西池桃萬樹幾夜躡神飈

友琴冊為陸太學題并呈思清孝廉

乃翁常任  
單父宰

名香蘿薜下一室素琴懸四壁  
青山响千秋白雪傳廣

陵新按譜單父舊鳴絃欲起鍾期聽乾坤對惘然

題祝無殊小像

一壑堪誰置三毛頰畔長豪吟卑下里狂興劇高陽綠  
水芙蓉社青山薜荔裳玄亭吾罷草媿爾及門牆

喻邦相束裝入計中途忽有遷杭之命寄懷二  
首

鳥已飛王令刀俄佩呂虔移官滄海上候吏大江前柳  
葉千家笛桃花十里船湖山真勝絕獨少伯牙絃

豈謂雙龍劍翻成獨鶴操樓臺三竺近省署萬松高海  
色飄行蓋湖光落畫舫不堪靈隱月飛夢對持毫

魚竹軒為玉叔大叅賦

別墅擅林塘開從顧辟疆龍鱗金照日鳳尾玉凌霜翠  
袖寒猶倚宮袍墮欲翔誰同濠上客散髮臥簞簞

憶王山人

沈瘦吾偏甚王癡奈汝何萬峰林屋杖孤月洞庭蓑鹿  
豕親狂態魚龍避醉歌一丘他日遂白眼對雲蘿



楊思悅邀集涵碧亭遇雨作

良辰饒勝集箕踞百花潭  
逸調飛金縷新詞度玉簪  
雷聲高棟入電影曲臺含  
河朔元吾黨寧辭十日淹

湖上汎舟憩俞祠同趙生汝元聽歌作

蕩漾青絲竿淹留白接羅  
人歌朝雨後客醉暮雲時  
隔竹觴頻送穿花席屢移  
他年懷李白應賦習家池

送方伯徐公入梁

夾岸桃花水春江照畫船  
雙旌辭嶺日六傳入梁年  
草

色申侯里棠陰召伯田勿云河內借劍履上甘泉

攜郭生汝沖憩山寺偶題

信步空王宅譚心佛子筵靈花紛寶地忍草覆金田  
刹影禪關外鍾聲梵閣前一僧頭盡白趺坐不知年

閏九月九日集趙汝元

高齋猶菊色名勝競過從月屆三秋閏天令九日重雲  
林眠獨鶴星斗墮雙龍悵望桓車騎遙聽遠寺鐘

送鄔生還京口

何緣京口客偶逐片雲來五岳邀遊興三都競賦才新  
裝淳化帖故里妙高臺笑殺茅平仲從軍樂未迴

壽漁塘余翁七秩

林塘稱大隱漁釣舊生涯亭下三珠樹簷前五色瓜金  
樽流紫氣綺席送青霞日暮斑斕袖翩翩舞百花

少室山房集卷四十一

欽定四庫全書

少室山房集卷四十二

明 胡應麟 撰

五言排律一十四首

汪仲淹病足三年未瘳余先有此疾半載始愈  
戲作十六韻嘲之并期起色焉

底事羈神足將因斷俗緣悠然疑入定嗒爾類逃禪箕  
踞蒼松下跣趺給樹前但妨叉手立偏稱曲肱眠筏舍

清江上杯留碧海漚按圖遊五岳隱几問諸天步學邯鄲客行嘲鹿苑仙漫愁雙屐折何忝一壺懸蹇拙存吾道驂驔記昔年盜驪元泛駕飛兔舊忘筌玉笈看長往金針待大還吾將倩磨勒負汝出蒼煙

贈董使君十六韻

紫氣黃山外青雲白岳傍五花元蹀躞千騎暫徜徉曙日懸官舍春風拂郡堂科徭閒巷陌獄訟臥桁楊異績東方最遐心北海長琳宮遊問政飛閣駐文昌鼓吹傳

清練謳謠接大鄣園桃紅照郭隴麥翠登場地主新知  
洽天人舊策良片言逾琬琰隻字並琳琅司馬邦人重  
元龍座客狂朱旗晨赫奕華燭夜輝煌意氣迴飛動形  
骸釋迷茫徵歌慚下里感事憶高陽漫擬扶風偕行看  
渤海翔戔戔柏梁殿第一待明揚

寄陳玉叔十韻

尚憶燕臺別長歌蜀道行元龍原俠氣仲舉最高名露  
冕千岩秀褰帷萬岫明地鄰巴婦穴天近夜郎城灌口

花相待峨眉樹若迎海棠開四座杜宇逐雙旌望闕依  
星象登樓試晚晴朱衣羣吏謁彩筆衆僚驚賦屬揚雄  
和詩從杜甫評支機有片石一為問君平

題柏萱圖八韻

紫岫元君宅丹丘阿母家簷前交綺樹庭際長瑤葩翠  
色凝霜秀孤芳伴日斜筠篁堪並古蕭艾豈同嗟密葉  
低垂露疎枝上拂霞亭亭驕晚節冉冉駐春華餐實心  
長苦忘憂思轉遐清冰元獨瑩純璞本無瑕片諾當年

許三遷異代誇願言仙圃外長御五雲車

賦得十五盧家女

十五盧家女歌喉繞畫梁西鄰窺宋玉東壁住王昌  
畫態真真似詩才盼盼長玲瓏聲窈窕靜婉質輕揚  
月下紅粧麗風前翠袖狂玉卮含國色金盒貯天漿  
解珮逢交甫更衣逐李郎終須募摩勒致汝鬱金堂

讀何氏集三十韻

何太史以先公仲默集見貽展誦興懷敬題



三十韻末簡

寥落黃初後詞壇更幾人齊梁紛藻繪元宋轉荆榛盛  
世占龍馬明時起鳳麟黃河懸日月嵩岳降星辰屈宋  
休前代盧王祇後塵才高梁苑客賦擬洛川神意氣橫  
今古馳驅邁等倫垂髻遊上國聳翮戾高旻天詔頒黃  
屋星槎下紫宸通滇窮越嶠諭蜀近峨岷弔古多停騎  
違時蚤乞身攜尊漳水夜飛蓋鄴園春歲序堪藜杖鶯  
花暫釣緡九重思麗藻雙闕召詞臣邂逅邊徐合賡酬

李薛頻雞林傳制作鳳沼降絲綸帝命軒輶出人看斧  
鉞巡橫經非寂莫執憲豈沈淪絳帳絃歌日青衿問字  
晨岳蓮垂二華宮柳暗三秦仙掌金莖舊咸關紫氣真  
夔龍方步武鵬鳥遽酸辛消渴相如伍修文子夏鄰調  
高原寡和道喪孰知津彩筆精靈遠瑶編絕藝陳千秋  
垂燦爛一代仰嶙峋鸞掖名長在龍門跡未湮淒涼玄  
閣草重覩玉堂賓貌識鄴陽烈詩傳水部親轉教山斗  
望悵絕潁溪濱

投贈督學滕公三十八韻

雲霧南溟外星辰北斗傍  
九霄迴氣色千里見飛翔  
大雅今誰屬明公早擅場  
應圖看騷裊絕代起鸞凰  
出入平津底超遷吏部郎  
攀花遊太液視草厯明光  
珮染金莖露衣含玉座香  
直躬行殿陛跼翼守遐荒  
瘴癘開盤水川原接夜郎  
停車蠻壘肅駐節海山蒼  
名姓傳閭閻絲綸下廟廊  
雙旌辭漢苑匹馬渡錢塘  
斧鉞江城樹樓船水國霜  
海隅興禮樂河宿斂文章  
時雨行連郭春風

坐滿堂真才呈琬琰異品得主璋沂水琴堪奏豐城劍  
有芒絃歌聞曲阜桃李遍河陽吾道乾坤闢斯文日月  
光六橋供艤棹三竺引飛觴黃閣聲華遠青冥道路長  
鸞書飛建禮鳳藻出長楊師範真遼絕生徒轉激昂陸  
機曾入洛司馬舊遊梁九歲題鸚武三冬解鸛霜上書  
思漢主作序擬滕王綵筆空凌厲丹梯尚渺茫塞翁悲  
失馬牧子嘆亡羊寂寞松蘿契蕭條薜荔裳一區原憲  
宅萬卷子雲床避世嗟秦士酣歌學楚狂煙嵐尋白石

雲水狎滄浪，厯塊憑誰試。連城祇自傷，幾年懷卞氏。此  
日遇孫陽，軹里心猶在。夷門念不忘，惟餘星斗色。夜夜  
繞干將。

奉贈督學喬公四十韻

大雅開元際，高風正始前。幾人操白雪，四海和朱絃。磊  
落陳王調，淒涼杜甫編。餘波空綺麗，哲匠幾雕鐫。盛世  
稱才子，明公實妙年。姓名懸寶籙，文采燭奎躔。已詫龍  
為種，曾聞鳳集肩。兩朝司馬學，一代子雲玄。漢苑昆明

外秦城太白顛看花韋曲雨攜酒杜陵煙賦以凌雲貴  
才因命世傳勝遊飛彩筆麗藻擲青錢斗畔雙龍氣人  
間五色箋沖騰隨八表取次上鈞天粉閣青綾被瑤樓  
赤玉鞭鳴珂趨建禮視草向甘泉鯢化風雷繞鵬飛宇  
宙旋一麾辭殿陞萬里問山川講道嗤王弼窮經答鄭  
玄絳帷朝入越清夢晚臨燕代北看名士關西仰大賢  
選才空萬馬罷講得三鱸竺國煙霄裡吳峰霧雨邊校  
文多暇日登眺儼神仙柳外林逋宅波心白傅船潮聲

吟際落寺影望中連隻字霜飈動千章錦繡懸宮商間  
自繞金石巧相宣氣壓珊瑚樹光生玳瑁筵赤城霞並  
起滄海月孤圓桃李三春合台垣計日旋碧霄看紫綬  
白屋有寒氊上策懷終孺遊齊憶馬遷屠龍空故業落  
蠹守殘篇學豈三冬富詞非子夜妍世途甘寂莫雲路  
阻飛騫已辱鹽車顧能忘國士怜鸛鵲愁泛駕魚兔有  
真筌萬仞終南色千秋太華蓮願言開覺路瀟洒出塵  
緣

壽大司空雷公四十韻

宇宙鍾名世山川誕哲人祥光迴八極紫氣動三辰晚  
節憂時念當年報主身飛騰隨白日指顧上青旻劍倚  
雙龍合橋過駟馬馴孤悰盟檜柏雅操勵松筠環珮燕  
臺上旌旗越水濱文章傳董賈名理陋莊荀桃杏千門  
色絃歌萬戶春驅馳違梓里簡渥近楓宸稷契堪誰伍  
夔繇早見親九霄垂氣象四海荷經綸瑣闥傳宣夜璇  
臺草創辰憂勤迴聖主搏節為生民制作傾流輩恩榮



邁等倫丹青圖駿馬名位掩麒麟前席長頒幣臨軒或  
賜銀明良時有待魚水契無鄰一夕金滕啟千秋玉几  
陳烏號空洒汨龍馭永朝真遺命乾坤闢謳歌海嶠臻  
大廷看正笏清廟仰垂紳社稷關心久林泉入夢頻留  
侯元辟穀張翰幾思尊勇退占賢達隨時悟屈伸挂冠  
辭殿陛解組出風塵烏履閒無棣詩書問有莘蒼生徒  
想像黃閣已逡巡雪瀑延清賞星潭理釣緝匡廬晴對  
客滕閣晚攜賓鶴引登山屐猿窺漉酒巾虹霓流甲子

河宿繞庚寅網祝新投鵠袍餘舊挂麟玳筵羅窈窕華  
館列芳新縹渺三株樹崔嵬五岳神金章垂素領綵服  
照朱茵朗月燕山桂明霞漆園椿方壺聊寄迹南斗待  
持釣版築徵前事樞衡憶老臣遙看紫泥詔早晚下江  
津

集趙汝申望衢亭大雪分賦同郭翌之趙汝元  
郢里徵歌日梁臺奏賦年飛霜流翠幙密雪擁華筵浩  
蕩龍鱗布飄颻鶴馭旋春陰濃四野瑞靄覆三躔海凍

鯨鯢蟄林昏燕雀懸灞橋初策騎刻曲乍移船葉落千  
林瘦花飛萬象妍亂飄鸞掖外斜洒鳳城前綽約翻多  
態輕盈自可憐珮疑湘女授璫擬洛神傳素魄瑤池近  
寒光玉座連清音迴白紵麗曲奏朱絃漫學瞿曇座誰  
參慧可禪輸他表僕射擁被日高眠

不佞自燕中歸後却掃閉關一時秬苑諸名公  
以吏事來越者雖聞問間通而逢迎都絕迺  
君禹蘇丈獨下詢芻蕘窮搜草莽停騶傾蓋

把臂忘形至貽贈諸篇金石鏗訇風霜錯落  
揄揚蔑副愧汗彌深敬題排律五十韻奉酬

大雅

宇宙開鴻運東南毓駿才華名懸八斗秀色動三台磊  
落賢豪契縱橫哲匠來青袍多士避赤幟萬人摧內翰  
詞誰匹中郎句獨裁王維元擢雋杜牧載掄魁片玉咸  
陽市千金碣石臺稱臣離草莽謁帝上蓬萊太液春風  
近長楊霽雪迴朱衣蘭署入絳帳棘闥開並列中朝彥

同蒐大厦材門庭饒董賈廊廡半鄒枚執憲皇情注傳  
經衆望推高空搏鳳羽大澤市龍媒伏夏牆逾峻毛韓  
席乍回連山繡象象分野別臺駘桃李參差發蓀荃次  
第培生徒紛負笈士伍競銜枚藻鑑明逾郭包涵德過  
裴剪裁俱繡綺追琢盡瓊瑰紫貝窮鮫室明璫擷蚌胎  
星辰諧奠麗河漢並昭回七十摠衣侍三千曳履陪風  
標崇泰華氣象薄岵嶠彩筆扶桑畔朱絃若木隈書藏  
神禹穴賦就越王臺攜客觀江漲逢僧話劫灰嵐光停

竺寺霞色候天台指顧登槐棘從容問草萊干旄晴掩  
映鹵簿晝徘徊少日題孤憤頻時和七哀卜居鄰木石  
隱迹混塵埃鴻鵠長矜志鯨鯢慣曝腮清湘晨葺芰孤  
嶼歲尋梅漫詫形如鶴真成背欲鮐紅顏勞想像白眼  
任疑猜總道三鱣隔能堪駟馬來逃榮知石戶守分識  
澹臺把臂行紅藥論心坐綠苔金蘭投管鮑膠漆誓陳  
雷厚義黃河溢深衷赤日摧長鑱猶雨雪短鋏驟風雷  
浮海懷偏壯藏山興未頽枯株慚匠斧鈍質快神鎚拒

戶非干木逃家異老萊蘭陰花爛漫潑水樹潑洄且自  
探玄草何妨醉綠醅天長窮鳥逝地曠大鵬迴浩思凌  
三極元神攝九垓會令千古色閩越共崔嵬

賀易使君父母偕壽三十六韻

玄圃崑崙外蓬丘日月邊殊方傳勝迹人代幾真仙藉  
甚文章客棲遲少壯年叔孫元學禮揚子舊談玄夜雪  
宮牆外春風壁水前杏園虛彩筆棘院墮青錢匡阜晨  
攜屐潯陽晚扣舷拂雲穿清峭臨水弄漪漣勇退聞先

哲雄蜚識後賢挾書遊建禮視草向甘泉太液池頭樹  
慈恩寺裡筵鶯花辭漢闕禾黍問吳田五袴謳歌起雙  
鳬舄履旋戴星離禹服瞻日上堯天冕拂金莖露香分  
玉座烟龍鱗看咫尺貝錦乍流傳帝謂淮陽近民稱潁  
水便之官同白傅奉使屬張騫擁節霜威靜塞帷雨澤  
綿香爐吟際出瀑布望中連觸目親闡阻馳情綵服偏  
西江移鼓吹南浦繫樓船燦爛緋桃實熒煌赤錦箋中  
庭羅窈窕別墅進芳鮮片玉輝藍井雙星耿婺躔蒼虬



臨几席駟騊候輜輶跨鳳來王母騎麟下偃佺白雲空  
入夢青瑣待鳴鞭鼎鼐調元氣舟航涉大川八荒偕忭  
躍四海荷陶甄瑞靄時時發祥光夜夜懸萬年觴咏地  
長奏碧霞篇

壽大學士趙公二十四韻

壽域黃扉啓祥光絳闕懸謳歌來六合氣色動三躔玉  
醴東華外金莖北極前八千逢景運五百降名賢潑水  
生申日南陽臥葛年

公郡望  
本南陽

詩書王佐業禮樂帝臣傳

錦向龍門奪藪當鳳閣燃探花晨太液視草夕甘泉虛  
受心如谷違時道若弦一麾俄去國雙屐乍歸田白社  
便高枕清溪樂扣舷直聲喧海岱正氣鬱閭閻密勿皇  
情注徵求使命遄商岩圖酷肖漢殿席頻前挾日潛鱗  
起凌風大翼翺新恩移國學舊德重經筵變理衷元赤  
登庸鬢尚玄窮邊收羽檄絕島靜戈鋌宰割羣方正調  
和衆味妍皋夔重步武稷契互周旋蓬矢春華邁椿齡  
暮節延安期分履烏王母駐輜輶社稷扶元老乾坤入

大還願為天一柱萬古鎮璣璇

送李山人入洛弔灌父王孫

夏五淹淮曲秋成問洛陽  
關河停別棹驛路促歸裝  
積雨連中岳飛雲斷太行  
芰荷孤旅盡蘿薜故廬荒  
滿目平原客何人弔白楊

少室山房集卷四十二

欽定四庫全書

少室山房集卷四十三

明 胡應麟 撰

五言排律一十七首

留別胡茅兩生十八韻

有序

僦居易水邂逅胡生澱元茅生厚之游處甚  
洽胡生家有臺榭池館余時時攜書帙坐臥  
其中門庭蕭然俗賓都絕茅生一室不盈斗

而長者車轍紛紛道傍余屢入都門駐易水  
問黃金臺故跡僅僅荒丘蔓草以為擊筑狗  
屠當不復覩今代何意兩生者伉爽俠烈儼  
其遺風兩生亦嚴事余朝平原而夕河朔或  
時挈粉白黛綠縱遊西郊東郭間至精廬佛  
閣一二浮屠善名理者暇日相與煮淡麪談  
真空生平壯心賴以耗磨銷釋且將卜居其  
畔挾二仲為終老計焉亡何余以家大人微

恙室人趣駕南歸兩生送余河梁之上誦賈  
長江却望并州及王中允陽關西出二詠泣  
然哀涕集於衣袂因稍次第一時過從陳迹  
為百八十言寄之異日者舴艋山陰道上訪  
兩生舊宅于剡溪風雪中即不見安道主人  
當毋訾子猷之興盡也

兩生皆  
會稽人

相逢燕塞晚共指越山陰問姓知花萼忘年是竹林  
跼蹐談異域舒豁快同心樓觀飛青藹軒窓護碧岑關遙

停紫氣臺迥貯黃金海上來三鳥池頭戲五禽雜芳羣  
爛漫喬木半陰森大業堪霞舉雄圖尚陸沈含毫霜色  
墜秉燭露華侵日日平康燕時時笠澤吟荒郊雲共遠  
野寺月同深愛客呼珠勒尋僧抱玉琴茶當流水淪酒  
傍亂峯斟劍合延津畔帆催潞水潯淒淒臨去袂惻惻  
乍分襟爾自耽玄寂吾寧嘆滯淫驅歌南去路鴈遲北  
來音何處懸青夢空階臥綠沈

胡尊人任北平叅戎而  
茅君父為之記室故結

語云

四明沈孝廉士安甫弱冠詞筆翩翩而丹青音  
律咸入妙解邂逅武林甚契賦贈此章

桂籍誇年少蘭心託漫遊霜蹄寒照夜風翮健凌秋意  
氣狂昭畧腰圍瘦隱侯筆搖鸚武座簫引鳳凰樓白練  
書屏脚青繒畫扇頭應知鵲橋畔計日待牽牛

秋杪渡江望金陵有懷惟寅少保并寄訊小侯  
汝藩八十韻

乍喜風期洽那知道路長倉皇馳海國躑躅問河梁興



盡燕山下魂銷碣石旁  
肝腸縈聚散涕淚逐行藏  
此日旋車地當年擊筑場  
陸生元入洛枚叟舊遊梁  
挾策逢王翰論交得孟嘗  
金蘭投管鮑膠漆重求羊  
俗詫相如慢公憐叔夜  
狂高歌神踴躍劇語興飛揚  
爾汝頻相喚形骸欲對忘  
聯鑣遊太液襍被卧長楊  
玉塵晨南陌珠簾夜北堂  
西園偕嘯傲東郭並徜徉  
傑觀捫鳩鵲層城躡鳳凰  
登山題翠巘臨水和滄浪  
藝圃千秋擷詞林一代翔  
希聲傳魏晉麗句薄隋梁  
屈宋交凌厲曹劉互頡頏

頽光芒騰李杜藻繪飾岑王治女青絲盒奚童赤錦囊  
金尊筵燦爛銀燭座熒煌浩思凌先哲玄心揖上皇雙  
鈎聯拱壁寸楮擲琳琅露砌行紅藥風簷坐綠篁霜華  
蘭桂揖月影芰荷裳夏驛馳山荔春郊綻海棠池餐菱  
芡碧籬嚙菊花黃痛飲誇司戶清齋詈太常百觥豪未  
厭五斗劇難量潦倒投車轄淋漓拭劍鏗行廚羅鼓吹  
步障夾笙簧宴樂前期盛升沈末路詳碧霄看起鳳丹  
壁笑騎羊志業垂鵬鷃頭顱狎虎狼賓朋違杜曲黨與

析華陽故里嗟囊藥修途問裹糧韶光同代謝土俗異  
炎涼楚越天迢遞燕吳地渺茫丹青求傳說圖畫失王  
嬙歲月蓬蒿度朝晡橡栗嘗登壇名岳岳飲泌樂洋洋  
僻巷開蘿逕深居構葯房簞瓢懸絕壑蓑笠憩橫塘厯  
落悲鴻漸翻飛覓鴈行攀龍時刺謬捫虱事尋常雨雪  
紅顏瘁風塵綠鬢戕乘輿留夜白伏櫪夢飛黃邂逅逢  
高座參差集上陽披襟逾慘淡把臂各徬徨動色談傾  
蓋關心念對床山陽全喪逝鄴下半存亡社冷餘春雪

臺荒翳夕陽七哀盈大宅萬感熱中腸道直躬如髮勛  
高背若芒孤誠疑博陸百戰忌平陽息壤閭誰叩中山  
袂易攘辱曾虞醉尉名尚怖降王是處囚安國何人雪

治長少卿寧負漢太白詎逃唐璞會明和氏珠應合孟

嘗

前孟嘗乃戰國四君封號  
此孟嘗人姓名合浦令也

餘生饒舌在九折鬪身強

鐵騎閑沙漠金雞放廟廊逡巡生馬角指顧脫魚腸燕  
領封仍在鷗夷汎未遑言歸哀戚戚惜別恨茫茫落景  
浮清渭飛雲動太行上書迴令伯陳啓急賓王羽翼分

歧路風標限屋梁  
瓜田情鬱鬱菽水思皇皇  
野岸冰漸結  
關城露色灑重來  
期阮肇再入待劉郎  
短策朝馳驟  
長謠暮激昂  
愁惟傾白墮  
夢幾熟黃梁  
廣漢懷捐佩  
清溪戀釣璫  
杏花源上客  
桃葉渡頭娘  
漫說幽期誤  
終知勝會償  
三山停鹵簿  
一水下帆檣  
養鶴新禪院  
啼鳥舊女牆  
盈盈白門月  
萬里共相望

北溪

惟寅所居地近杏花村在白下淮清

送沈純甫司馬還就李十八韻

祖帳燕城外仙查潞水濱掛冠辭日月投袂出風塵節  
槩虞翻亮心期賀監真五湖深買宅三輔劇埋輪磊落  
千言疏嵯峨萬折身羅浮雲喚客大庾雪迎人絕徼孤  
行戍長途數問津鴻冥初返越驚舉更遊秦劍氣雙鉤  
躍爐香八座親才高元誨忌道直嘆無鄰勇退占賢達  
遐思悟屈伸金臺馳駿骨玉陛盼龍鱗黃菊浮村艷丹  
楓抱驛新暮嵐藏嶺樹秋色露江蓴北斗名逾重東山  
望未湮列營屯虎豹飛閣耀麒麟赤舄應無棣玄纁自

有華沉沉合宮夜前席候經綸

花燭詩十四韻

蜃脂仙音妖燭三事  
俱散見唐人小說中

春色照房櫳迎親夜正中杯光才泛綠燭影驟搖紅絳  
蠅傳唐陸青烟出漢宮開花疑蒂並結蕊驗心同滑膩  
頻消雪輕盈半受風流輝呈瑞露吐燄發晴虹玉樹前  
階並金蓮後院通紗廚螢燦爛綺閣蜃玲瓏引鳳來丹  
穴乘龍下碧空蘭膏焚易徹桂燼落難窮巫峽雲飄蕩  
藍橋霧鬱葱昭陽明舞燕洛浦炫驚鴻妖魄藏逾媚仙

音奏未終良宵恣歡洽朝旭漸瞳矓

龔使君合祀供奉拾遺於任城紀事三十韻

有序

濟上故有太白樓及杜陵南池云兩拾遺常  
客其間歲久皆頽沒荒草乙未之春晉陵龔  
觀察子勤來莅茲土不逾月修葺繕治翼然  
更新仍別為祠合酹李杜其中余既幸兩公  
以羈旅遭逢異代且快睹觀察斯舉有大造  
于詞場也輒賦其事為五言三十韻以並致



高山之仰云

齊東浮大澤濟北滙飛泉亭古淹詞客樓高卧謫仙聲  
名偕宇宙藻繪劃星躔奕葉流風謝沉冥歷數遷芳塵  
誰想像故蹟重留連有美延陵季神交百代先韶顏舒  
彩翮綺歲奪青錢磊落王褒頌洸洋曼倩箋金羈遊太  
液玉珮侍甘泉絳闕恩光動黃堂惠澤宣吳峯翔省署  
越水觀樓船謗牘初辭魏除書驟發燕虹蜺流鹵簿雪  
霰耀戈鋌意氣中原盡心期大厯偏行春懷勝躅吊古

惜名賢嗟咄崇祠樹熒煌巨碣鐫丹青塗傑構俎豆飾

長筵衛竹縈窻勁秦松夾座鮮綠蘿垂倩峭紅芰浴淪

漣西陸迴真氣

太白自稱隴西

南池薦舊篇延津龍劍合海岳

鳳毛聯白鶴云亭上蒼虬泰岱巔並懷和氏璧齊奏伯

牙絃是處憐方駕何人快著鞭蹉跎投賈賦寂莫問揚

玄未授楞嚴記空留道德編壯心斜日外愁色斷雲前

慘淡論交臂蒼茫失並肩沙棠停畫鷁隴樹咽寒蟬萬

古如澠思長歌酹碧天

齋頭春草和相國趙公

逕草積如裊蕭疎斷俗塵不隨金谷艷長占玉堂春繞  
砌青疑滴當窓綠漸勻霏霏烟色麗熒熒露華新細雨  
留征旆斜陽逐畫輪西堂偕夢弟南陌伴攜賓靜對談  
玄客幽逢覓句人榮枯憑樂育生發荷陶甄太液皇仁  
布平津相澤淪為將庭卉意九域播洪鈞

寄景陵徐使君三十韻

有序

徐初以宰邑異才最天下後數更盤錯所至

有非常稱近又鑿淮上新渠底績云

七澤浮真氣三湘兆異人虹霓流藻繪海岱入經綸洛  
下名先著河東賦蚤陳朱衣馳棘院赤舄上楓宸碧漢  
搏雙翮潢池沸萬鱗笑談清寓縣顧盼出風塵楚壁騰  
輝舊燕金動色頻花封移愷悌蘭署贊清寅枚叔聲華  
艷文翁治化循分符勞漢吏約法諭齊民皂蓋明雕轂  
朱繡結畫輪黃山遊汗漫白岳駐逡巡里閭蒲鞭洽郊  
原竹馬馴孤懷吟岳麓遠思逐峨岷綬解防消渴簪投

習隱淪春眠高隴樹秋擷大江蘋帝夢徵良弼朝思問  
鬼神榮光浮紫極厚幣出青旻淮甸褰帷入徐方列戟  
巡滔天勤哲后敷土急賢臣雨雪偏垂橈風濤日算緡  
決排羣議劑疏鑿衆材掄遠利超三策殊功羨十旬忘  
家心匪石憂國鬢如銀白馬初沈日玄熊創覩晨休禎  
符鸞鸞異相卜麒麟南郭竽真濫東方篋轉貧窮愁嗟  
阮籍厯落誚桓倫鷗散仍居魏貂殘重入秦防身雄劍  
在夜夜拂星辰

題陸履素使君兩朝八命冊二十四韻

黼黻開金殿絲綸下玉除  
蒼龍雙御極紫鳳八銜書  
睿藻飛岩穴天恩湛里閭  
虹蜺懸巨軸駟馬集高車  
五世環投雀三朝珮映魚  
機雲人望切遜抗吏才舒  
試縣催鳬舄專城列隼旗  
朱絃鳴浙瀝黃綬曳清虛  
鹽鐵初裁論緡錢乍權儲  
桓寬文彩耀劉晏策籌攄  
煮海心聊繫看山興自如  
登壇攜大筆倒屣納長裾  
雪夜船移戴風晨榻挂徐  
名流饒吐握寒士極吹噓  
西竺時參梵南屏

或叩漁蛟宮鑊錦貝鷺嶺簇璫琚河內賢勞劇淮陽歲  
月除達人齊久近明主惜居諸雲霧披丹闕奎躔煥石  
渠殊榮喬梓並遠思蓼莪舒棘寺騫騰外槐堂盼望餘  
千秋未央詔永永賁幽墟

大參維揚張公過訪武林旅邸中賦贈十六韻

淮海生人傑翩翩第一流水壺寒照夜霜鉞淨含秋大  
樹榮東國甘棠匝上游苔溪頻駐節蘭水半維舟五馬  
追風電雙龍射斗牛新栽玄草社舊詠白蘋洲器宇司

空並聲華博望儔星芒朝帝闕日彩扈神州下士輸青  
睫論交異黑頭懷珠玄俗傲抱壁卞和羞潦倒親長鋏  
殷勤拂敝裘湖光芒履盡江色布帆收肱在餘三折腸  
迴劇四愁孤誠懸海底片諾重山丘指顧排閭闔參差  
侍冕旒黃金未央詔行見出燕幽

題寄亭十四韻祝山人別號也

寂寞談玄第何人重起予雲霞雙草屨宇宙一蘧廬供  
奉神遊外蒙莊物化餘踰垣時學段懸榻間留徐綠綺



孤琴奏青絃四壁儲那知金是谷寧羨石為渠白雪流  
湘瀨清飈扇舞雩雙林來梵釋六洞過樵漁芳草從滋  
蔓飛花斷掃除尋丘紫薜荔尺水漾芙蓉甲子初周白  
春秋正及遽曲肱聊寤寐容膝暫踟躕大隱依泉石中  
行在里閭吾將戒行轍蚤晚賦歸歟

問歐楨伯訃八韻

有序

楨伯以是歲大耋余方圖寄一詩而訃至交  
游垂盡哀涕泣然

尚憶黃冠歲扁舟向若耶青牛埋紫氣白鶴隱朱霞劍

合延津畔

楨伯最善惟敬今俱低遊

竿留渭水涯

年政八秩

翻飛神武闕

寂寞廣文衙逸駕開元逝鴻裁正始遐高原騰雉兔大

澤返龍蛇庾嶺梅空折羅浮桂漫芽惟應蒿里月夜夜

慘霜笳

東相國趙公二十四韻

有序

相國趙公乞休章十數上而聖眷愈殷凡其

投夢林泉寄情澗壑者具悉懷山諸咏中不

佞既倚韻遞酬邇復示我歸興十絕翩翩然  
神遊八極想因竊取其意為長律二百四十

言

八極黃扉上三台絳闕前夔龍扶舜日稷契在堯天磊  
落熙朝佐飛騰命世賢經綸侔董相學術邁彭宣虎觀  
無雙對龍墀第一傳直聲朝野震勁節廟廊薦吏隱羅  
浮僻春生大庾妍朱明留巨碣勾漏覓真詮六洞深迴  
轍雙溪獨扣舷桃花人代隔柳色歲時遷雷電驚千域

風雲動八埏數文毗夏后奮武翊周宣絕島憑陵日雄  
邊覆沒年謨謀羣策聚籌略萬夫先撻伐過平壤芟夷  
遍赫連吳綾貂帽渥蜀錦獸袍鮮賜屢馳中極心長繫  
太玄赤松遙入夢黃石驟忘筌浩蕩皇情注優游聖澤  
綿謗寧傷意以名轉重蘭荃雅量乾坤小孤忠社稷懸  
鳴岐仍鶩鶩釣渭正鷹鷂海晏知難俟河清詎偶然轉  
將良弼夢移告北山巔

題瀛海長春冊

代

大中丞河間劉公家門貴盛冠冕一代迺二  
親偕登大耋尤近代希有者敬賦長律二百  
八十言

南極呈輝夜西池設宴辰遐齡曾覩伏間氣重生申大  
府俱三事高堂並八旬棠枝聯寶桂萱萼競莊椿淑問  
馳邦媛英材降岳神懷中金紫客掌上玉堂賓彩日鳴  
雙鳳丹霄躡二麟機雲慚未駕尾雅鬪前身學士羣工  
艷中丞百吏寅絲綸懸寓內節鉞樹江濱苦縣藏書富

華陽授籙頻蟾蜍流月窟烏鵲渡天津象服彤墀下龍  
章絳闕陳岩廊交黼黻里閑集簪紳賦擷梁臺彥謳騰  
越部民歡聲羅甸服喜色動城闔黃鵠屏間戲蒼虬戶  
外馴尊壘浮竹葉絃管沸花茵霧隱偷桃孺霞明種杏  
人圍棋邀謝傳投轄駐陳遵將相庭階植師儒禁闥掄  
十州環撫御八表俟陶鈞雨足耕莘耜雲間釣渭緡優  
游黃髮皓容與白頭親握箕躋恒華添籌邁劫塵劉樊  
偕混沌孫馬互全真解珮虛臨漢吹簫謾入秦綿綿瀛

海上寶厯慶長春

壽何太史啓圖六秩二十韻時尊人亦以是歲

八句

間氣生申日靈圖出洛年春秋曾五百甲子又三千閼  
閼聞當代弓裘嗣昔賢凌雲懷舊賦却月和新篇弱冠  
遊中秘清朝臥太玄帝遴金匱客人艷玉堂仙夜被吳  
綾薄春袍蜀錦妍蓮燈移大內藜火揭高天玉座星辰  
綴瑤臺日月聯參差朱綬下次第白麻宣鳳起垂雙闕

鴻冥驟八埏振衣王屋霧飛蓋鄴城烟墅卜藍田下堂  
標綠野前琴樽芳草靜枕簟落花鮮蘭桂堦庭合桑蓬  
戶牖懸寰中呈上瑞象外得真詮黃鶴峰頭駐青牛洞  
口旋浮丘晴旭近函谷暮雲偏突兀珊瑚樹輝煌玳瑁  
筵西池流寶液東壁煥琅編白石圖空兆蒼生頌久傳  
車輪馳上國舟楫濟長川姓字旂常耀勲庸竹帛綿還  
將大椿壽一代庇凌烟

送王水部之錢塘



乍捧周王檄言乘漢使槎賦掄新竹箭吟戀舊梅花海  
曙占霞色江明逗日華樓臺籠紫氣城郭護青沙故國  
吳都稻春山越井茶應知苧蘿艷十載抱溪紗


詰朝雪不解再柬永叔黃門二十四韻并邀同

賦

密霰三冬集玄雲四望同迷漫屯巨壑浩蕩布長空拂  
曙光交映連宵勢倍雄廉纖時雜霧淅瀝暗隨風漠漠  
緣堤厚霏霏入壑融重陰浮海岱積素暈河嵩擬絮情

殊慙探梅思未窮凍埋深浦竹寒折大江楓遠渚拳饑  
鷺荒陂匿斷鴻貂殘秦塞上鷁返越溪東沾濕全妨舵  
傾敲半壓篷羣呼憐榜豎獨釣羨漁翁爨擁孤烟白爐  
煨宿火紅衾裯屏障外几簞畫圖中翠管徐聞笛冰絃  
驟拂桐褰簾珠錯落振珮玉籠葱石鼎龍涎汎甕甌雀  
舌鎔錦袍狂太白彩筆粲文通飛動昭陽燕翩躚洛水  
鴻輕盈團粉頰綽約膩酥胸握麈神先王持螯興愈洪  
登仙寧有道中聖自無功流徵傳詞客清商奏樂童君

看白雪賦萬古孝王宮



少室山房集卷四十三